

辛亥革命百年志念

壯士已乘鴻鵠去 鏡海逸響猶低迴

柳蓮編輯

辛亥革命（本自維新）經歷了一個萬般艱難甚且酷烈的世紀。可恨後來居上之竊國者，或昏昏或噩噩，粉墨登場大言不慚，由政界而學界，愈演愈酷，終於洋洋乎讓看官們心弗疑之，竟相信了那戲臺上的皮裡陽秋演義就是百年中國輝煌的歷史。少時嘗讀魯迅夫子〈為了忘卻的紀念〉，不禁神傷痛泣。然而時過境遷，此刻已忘卻少年愁滋味矣。惜夫，辛亥革命！惜夫，少年之中國！老大懷念劉和珍君和鑑湖女俠秋瑾，忽有詩句云：“壯士已乘鴻鵠去，鏡海逸響猶低迴！”於是在床頭抓起吾師章文欽先生編的《澳門詩詞箋注》（民國卷）大誦一過，胸中鬱積，一吐為快。何不抄出幾位曾經追隨孫中山先生足跡的前輩詩人於澳門徘徊詠歎之詩作，供同好性情中人回味一番，聊以示吾曹未能忘懷濠江故人而情猶繫之也。

陳卓平（1878-1953）

粵新寧人氏，先於新加坡經商，光緒卅四年（1908）加入同盟會；宣統二年（1910）與林君復建立澳門同盟分會，任副會長兼秘書長，主辦澳門閱書報社；翌年參與為黃花崗起義籌款；武昌起義後參與策動前山新軍起義及香山縣政府反正；廣東光復後為省臨時參議員；1912年任茂名知縣；後隨朱執信進行反袁討龍；1917年赴澳門辦學，翌年任臺山沙捐兼清佃局總辦；1926年後創辦香港愛群人壽保險公司、太和醫院等；抗戰時期寓居港澳。

濠鏡講學

——民國五年，討袁事終。余以頻年奔走，學殖久荒。六年，設教澳門聖味基街，生徒數十人；課餘自課，冀收教學相長之效。

內外頻奔走，數年國事忙。

張椎纔放下，孔鐸便宜揚。
學派江門近，春風鏡海涼。
課餘乃自課，師弟同一堂。

南旋後暑假期滿回澳上課

容易秋風至，濠江蟹正肥。
酒詩隨我好，桃李繫人思。
政海歸來後，名山作述時。
志書多未讀，又下董生帷。

梁生錫邦前在澳門受業
別十八年矣，今來港設校授徒
因求題扇之便，賦詩勗之

十八年前問字時，垂髫是個小男兒。
久離鏡海渾如夢，今到香江已作師。
擇地好成新館舍，聞聲猶認舊風姿。
一簾化雨斯文在，衣鉢相傳喜可知。

贈劉公裕同志

公為鏡海老同盟，躍馬前山義氣橫。

卅載邯鄲原一夢，白頭相見恨餘生。

—— 辛亥年，余組澳門同盟分會，與公暨林、莫諸君，運動前山新軍，九月十五晚舉義，光復香、順，進駐羊城。今倏忽將卅年矣，白髮相逢，傷今思古，不禁慨然。

驅龍數載歷諸難，克定雷州奏凱還。

忘卻長糧思汗馬，戰袍今尚血痕斑。

—— 民國四五年，余與朱執信先生設機關於澳門，運動軍隊，驅逐龍濟光。公奉委第一軍參謀兼第十四統領，潛入內地，聯絡諸同志，克復雷州。時公為澳門工務局員十餘年，將屆期滿，例享長糧，竟犧牲不顧。

澳居閒寫

國難依然鼎沸時，澳居何日賦歸辭？

杜陵留蜀避安史，靖亂豈無郭子儀？

昔年盟友集濠江，逐虜驅龍熱滿腔。

今日重來尋舊雨，晨星幾個半眉厖。

—— 重晤劉公裕、王岐生、林謙甫、馮秋雪、馮印雪、趙連城諸君；而劉、王、林三人均已年逾六十。

買得長竿學釣魚，南灣海景近家居。

何時最合垂綸候？紅日西沉月上初。

贈林謙甫同志

辛亥濠江集，羣雄奮請纓。

黃龍期共飲，白馬喜同盟。

落日班聲動，秋風劍氣橫。

—— 九月十五晚，舉義前山。

卅年重握手，兩個老蒼生。

澳門度重陽節

兩載重陽節，濠江淡淡過。

秋高人正健，氣爽興尤多。

松菊懷三徑，年華感一梭。

王宏來送酒，元亮快如何。

—— 是晚王岐生攜酒來叙。

人生行樂耳，佳節莫輕過。

清酒一壺醉，嘉餚幾味羅。

休譚故國事，祇唱重陽歌。

—— 宋慶曆五年九月九日，帝以〈重陽曲〉宴羣臣。

來歲到今日，帽吹白雲阿。

旅 澳

旅澳非得已，總因違難來。

香海衝煩地，隨處皆塵埃。

廣州兵燹後，瓦礫滿成堆。

萌溪原故土，本可松菊栽。

載塗多荊棘，水陸梗三台。

迫得投濠鏡，暫作避風臺。

雖乏故交到，幸有筆硯陪。

教把前賢貼，日臨兩三回。

庚辰十二月廿三日，在澳門度懸弧節

癸丑癸卯余生日（十二月廿三日），

年年此夕興頗豪。

自從廣州淪陷後，臣朔都忘採仙桃。

舊年老妻在濠江，黃鸝紫蟹醉醇醪。

今年老妻赴羊石，漢碑晉帖靜揮毫。

閉門謝客免酬酢，聲言過港欺兒曹。

清茶淡飯安若素，閒鷗野鶴自翔翱。

豈知隔鄰吳姓東道主，二十餘年交誼高。

素記鰕生懸弧節，且效王弘來敬陶。

道有果餅和酒肉，饋與先生作燕毛。

卻為非禮拜而受，頓令厨娘形轉勞。

恍同馬周飲逆旅，獨酌悠然快老饕。

馮秋雪 (1892-1969)

廣東南海人，少時就讀於陳子褒創辦之澳門灌根學塾，在澳加入同盟會，投身辛亥革命與討袁鬥爭。後在澳門從事文教工作，與友人合辦南華印字館，出版《詩聲月刊》；創辦佩文小學，任校長；創辦雪社及參與創辦澳門中華教育會。1927年大革命失敗後受楊匏安等委托，將佩文小學擴充為中學，以掩護革命活動，曾被澳葡當局逮捕，經謝英伯營救獲釋；抗戰初期，任中山大學戰地服務團駐港辦事處主任。建國後任廣州市文史研究館館員，著有《宋詞緒》、《金詩絕句選》、《金英館詞》、《甲申夏詞》、《秋音甲稿》、《乙稿》及《水珮風裳集》等。

雨夕出西灣作

雨入西灣迴，憑欄世欲忘，
人間千萬意，誰及雨絲長？

靜到無人到，西灣風雨秋。
可堪在晴日，俗客滿街頭？

四月望夕，佩賢姑娘邀余
及哲士、草衣、馬交石步月

清宵天遣作清遊，月姊豐容似舊否？
憔悴吳儂悵春去，
——今歲四月十四立夏，去今纔一日耳。
一堤燈火亂明流。

落落入間到夜分，蛙聲鼓吹似呼羣。
林梢好好團團月，誰惜深埋一片雲？

休論恨雨與愁煙，滿地梨花意欲仙。
——是夜月色頗佳。
勝會今番遙指月，一年二十四回圓。
——佩賢有彩雲易散勝會不常之感。

四月二十三日，佩賢女士
宴余及連城、哲士、草衣於文園
女士席上成詩索和即韻奉答

經無量劫又相逢，幾度花開綺席中。
如此清容誰得似，令人惆悵春意濃。

得伴清遊不羨仙，人天辛苦古今憐。
吳儂早已傷搖落，莫遣愁心到錦箋。

連城、印雪同宴佩賢、草衣、哲士
於杏花邨，席上諸賢有佳作
余亦草成一首

落晚城霞到水隈，風光融泄幾人來？
蘭缸似有纏綿意，眉月低憐潑灑杯。
已拚流光隨馬去，漸多詩思為花開。
青春可耐蒼涼感，醉約姮娥月一回。

七月十五夕，偕冰雪、印雪、
草衣、贊如樂園看月

落落人間向海隅，江天寥廓月圓初。
芳園今已無車馬，秋入河山景亦殊。

高陽臺 娛園賞菊用沛功元均

曲檻疏煙，花還似霧，秋容偏對斜陽。
縹緲仙姿，消他如許風光。
寒英簇簇如人澹，共秋心，都落吟囊。
最愁儂，容易西風，頓老幽香。

年時好到樊川笑，看明眸瞰水，飛燕新妝。
舊日蕭娘，朱門幾度迴腸？
嫣紅姹紫參差過，賸陶籬，獨耐清霜。
卷簾衣，分付寒蛩，來伴孤芳。

漢宮春 南灣步月

明鏡酣雲，乍菱花再洗，一片秋香。
風輕鳳簫聲細，漏箭催涼。
綠榕灣畔，愛清宵、三五徜徉。
冰漸響，蛟龍睡醒，唵喁波底銀光。

何用雕龍繡虎？縱雲屏夢窄，玩月堤長。
人生百年有幾？雨驟風狂。
素娥憔悴，趁西風、又向人黃。
誰惜桂陰滿地，不教步履遑遑？

別西灣五年矣，春盡重來，
緬懷舊侶，不勝依黯

堤樹低枝拂曉芒，日高猶自色蒼蒼。
尋常風物都留眼，為恐重來海有桑。
獨尋陳蹟荒堤畔，誰識予懷痛逝深？
春盡烏啼寥廓晏，水聲長送萬波沉。

初春歸澳示印雪

流水無根蒂，飄然又轉蓬。
兩年知劫短，小聚惜尊空。
骨肉今能幾？韶光昔易窮。
且乾家國淚，來對淺春紅。

秋宵濠江友人招飲妓席上作
用印雪〈還劍湖月下〉韻

月馳星張似有聲，倭氛蜚吹氣何盈？
感時未必花能淚，驅悶徒知酒亦兵。
散漫雲生蒼狗態，流離意愴古今情。
一身萬累嗟何及？家國思量欲忘生！

鄭天健 (1900-1975)

香山人，少從同里宿學鄭哲園遊，肄業廣東高等師範；1923年起主香港《大光報》筆政；1938年任湖南省政府主任秘書，旋調任湖南《民國日報》社長；抗戰勝利後任湖南省國民黨省黨部委員兼宣傳處處長，廣東地政局局長；1948年任廣東中山縣長；1949年赴香港，任香江書院、德明書院、新亞書院、香港中文大學聯合書院教授；1959年任《中國人》週刊主編，次年參與創辦中國書院。早歲參加南社，長於詩詞，有《水心樓詩草》、《水心樓詞》、《水心樓詩話》、《水心樓詞話》等。

避亂登澳門媽祖閣

壯抱非寥落，濠江自渺茫。
還尋小邱壑，惜此好流光。
雨意通高樹，雲陰走上方。
親朋更天末，誰與誦繁霜？

普濟禪院

五月雲陰重，禪房不見花。
輕風動香篆，細雨雜胡笳。
浮海心猶壯，依人計已差。
更憐僧太瘦，來試雨前茶。

南環雜詠

戍樓寂寂角聲殘，水拍疎榕地特寒。
一海黃雲沙島落，更無人倚鐵欄杆。

石磯人怯一絲風，喚渡前灘語未通。
山外夕陽樓外雨，秋江何處不濛濛？

怒潮滾滾月遲遲，潮自顛狂月不知。
郎愛怒潮儂愛月，夜深無計立多時。

簇簇樓臺散暮煙，花陰淡淡草芊芊。
漫言信美非吾土，一壁何能讓許田？
——春秋鄭伯以璧假許田注，假一不返矣。葡萄牙租我澳門，今竟認為領土。

重登澳門媽祖閣疊前均

雨勢仍侵海，雲山互混茫。
危欄噓薜氣，亂石掩花光。
吾意真無際，茲遊未有方。
山靈應笑我，一別總三霜。
——九年三至。

梁彥明(1885-1942)

字哲士，號臥雪，又號天臺山人。廣東新會人，早歲畢業於南海師範學堂及兩廣優級師範學堂。宣統元年(1909)至澳門，創辦崇實學校，任校長；旋加入同盟會，為同盟會澳門分會骨幹；辛亥後參加過討袁、抵制日貨及“五·四”運動；1920年與劉雅覺神甫、馮秋雪、劉君卉等創辦澳門中華教育會，自20年代中期起為該會主要負責人，並任國民黨澳門支部常務委員；與馮秋雪、馮印雪、黃沛功等共組雪社。抗戰期間致力於抗日救亡運動，拒絕敵偽勸降，1942年12月，在澳門龍嵩街遭暗殺殉難。抗戰勝利後，門人郭輝堂等輯刊其詩作及紀念文字為《梁彥明烈士紀念集》。中山麥孔檀在集中稱譽他，說：“白傳才高，右軍墨妙。言詩則遙宗李杜，論道則近伉程朱。倘遇貧寒，乞鄰猶與。若談風月，終夜不倦。斯又為朋儕所同欽，澳僑所共羨也。”門人謝永先述其志節行事云：“自瀋陽事變，公知國難亟而外患深。迨蘆溝烽火，敵焰益張。(……)乃糾合同志，為積極救國運動。舉凡國債之勸募，抗戰之宣傳，與夫組織慰勞受傷士兵，集款撫恤陣亡將士，遭難者與以指導，漂泊者與以維持。呼號奔走，力竭聲嘶；更復秘察敵偽

行動，密告抗戰當局，鞠躬盡瘁，靡計晨昏，而敵寇嫉之矣。其始也施以利誘，其繼也施以威迫。友輩咸以公危，而公以堅貞凜烈之氣泰然無懼，(……)遂其許國之志！”

西灣夜遊偕雪社諸同志

一輪明月印江寒，堤畔閒行共引看。
今夜勝遊宜記取，綠榕蔭裡話悲歡。

關 關

關外斜陽一角留，纍纍青塚照人愁。
瘡痍慘目生何樂？責任如毛死亦休！
墻巧幾人驕妾婦？荒倉無個不公侯。
百年富貴比優孟，誰是人間第一流？

西灣閒望悼松壽

偶出西灣路，漁歌隔岸聞。
江潮晴湧月，山氣夜蒸雲。
死別悲吾友，浮生付水濱。
那堪寒食近？憑弔淚紛紛！

憶舊遊 南灣步月

記濠江似練，人寂宵深。
結侶同遊，四境淒清甚。
幸是多情月，朗照當頭。
金波激灩千頃，倒影印瓊樓。
看十里長堤，風光如此，遠勝揚州。

慨朋歡難再，良會恰逢。
且狎鷺盟鷗，河上逍遙好。
踏碎榕蔭碧，隨處勾留。
眼前景物指點，萬象中收。
我更欲乘風，蒲帆遍訪洞庭秋。

江樓晚望

流霞片片落前川，樓閣臨江景最妍。
十里漁歌千頃浪，半堤燈火萬家煙。
樹迷彭澤先生柳，門泊潯陽商婦船。
閒數暮鴉歸點點，酒餘晚望意悠然。

髻髻當軒一畫懸，湖光嫵媚境疑仙。
千巖黛色侵簾幕，幾陣濤聲雜管弦。
壯志已同樓蜃幻，勞形翻羨海鷗眠。
移家欲向煙波老，未識漁翁可結緣？

海上窮居閱歲年，納涼閒倚曲闌前。
登樓漂泊悲王粲，報國勳名愧謝玄。
十字門斜潮滾滾，三巴路杳草芊芊。
地淪甌脫添惆悵，悽絕胡笳薄暮天。

中流放眼思繇繇，互市誰先我着鞭。
帆楫參差隨水活，魚蝦陸續上江鮮。
航程漠視開山祖，界務空爭領海權。
誤國幾人嗤肉食？六州鑄錯慨籌邊。

西堤漫興

浩蕩乾坤雨復晴，東西洋好望分明。
如川厚重知誰是？似水公平契我情。
向晚帆檣猶絡繹，送春風月便淒清。
萬千氣象供憑覽，俯仰低徊百感生。

夏雨暴作偕宇雪、秋雪夜遊西灣

澳中清士馮周梁，聯袂邀遊意興狂。
時維首夏多梅雨，人間火宅盡生涼。
蒼茫領略西灣景，聽罷濤聲看電影。
阿香作態示威嚴，霹靂頻頻起南嶺。
漫漫黑夜孰與俱？惟我三人步復趨。
魚龍出沒海之角，雙目千里窮冥邈。
衣襟雨濕何淋漓，手挽銀河清斯濯。
風起水湧浪排山，潮流澎湃似時艱。

乾坤整頓待何日？匹夫有責耻投閒。
濠江濶跡將廿載，歲月蹉跎鬢漸斑。
蒼生苦海陷溺深，狂瀾力挽仗婆心。
社會混濁有如風雨惡，浪捲波翻起蛟鯢。
弱肉強食說《天演》，螳螂捕蟬飽黃雀。
我生不辰拚與戰，安忍坐視任侵略。
吾懷如此人亦然，相期努力勵仔肩。
久雨望晴亂望治，默祝天心如人意！
噫吁嘻！西灣遊遍復南灣，世外桃源屬此間。

舟行晚望

海闊天寬島嶼分，松山東望峙江濱。
帆檣絡繹梭春水，樓閣參差聳暮雲。
連楫空懷祖刺史，樓船誰是晉將軍？
一舟洄溯多興感，容與中流話夕曛。

丁丑除夕 次王惺岸先生韻

夏朔於今俗尚承，迎春守歲幾家曾？
賣癡人有同三楚，擲錦誰能讓五陵？
語到吉祥聞盡喜，債頻追討最堪憎。
明朝國運隨時轉，狂寇無難一鼓膺。

戊寅除夕次韻奉酬

年屆知非鬢已霜，飽經世變視家常。
倭氛今夕期消弭，魑魅明朝祝遁藏。
廷議和戎懲晉宋，市居樓隱愧由光。
堂堂歲月蹉跎易，老守青氈學殖荒。

聽松山館有桃樹重陽著花
客引為瑞，賦賀主人何斗燦醫師

館南有桃樹，樹旁幽人家。
似傳春消息，偶然重九花。
向陽得暖氣，一樹如絳霞。
頗嫌眾芳寂，點綴壓檐牙。

物態時多變，客言端足誇。
主人大國手，黍穀回春葩。
藥欄多采擷，仙竈富丹砂。
董杏同妙用，延年事可嘉。

趙連城 (1891-1962)

又名璧如，號冰雪，廣東香山赤坎鄉（今斗門）人，馮秋雪夫人。早歲就讀於澳門培基學校，入同盟會，在濠鏡閱書報社及香港實踐女校工作；參加辛亥革命，南北和議後返澳門，與馮秋雪創辦佩文學校；“五·四”運動後創辦《詩聲月刊》；大革命失敗後，協助掩護港澳中共黨員轉移，印刷《紅旗》週刊。曾任廣東婦女傳藝所教務主任；抗戰時期，參加中山大學戰地服務團；建國後定居廣州，為廣州綿社、澳門雪社社員，有《江村雜詠》。

西灣遇雨

堤邊一霎無情雨，滄海橫流捲地來。
幸有綠榕張翠幕，不然人作水中鮑。

重九隨同社諸子雅集樓船作

舍陸尋舟世罕儔，重陽佳節酬高舟。
今朝一事堪惆悵，不帶黃花上小樓。
——夢窗〈重九〉詞有“簾半捲，帶黃花、人在小樓”之句。

南灣步月

綠樹彎環宛似眉，清宵雲淨步遲遲。
堤前流水天中月，一路隨人不肯離。
為愛嫦娥不忍眠，分花扶柳過堤邊。
鄉思今夕應千里，憎煞嬋娟作意圓。

南灣燈影

一天無月漏沉沉，堤樹猗猗萬態森。
好是華燈憐寂寞，臨流搖出萬絲金。

黃節 (1873-1935)

字晦聞，號純熙、兼葭樓主，廣東順德人。早歲師從同邑名儒簡朝亮，憤清廷失政，走上海，與鄧實等組國學保存會，主《國粹學報》筆政；參與組織南社，入同盟會，以詩文宣傳革命。辛亥後任廣東省高等師範學堂監督、南京臨時政府稽勳局名譽審議，並在廣州創辦《天民日報》，反對袁世凱稱帝。嗣任北京大學教授；1928年任廣東教育廳廳長、廣東通志館館長；1929年春辭職，居澳門，同年秋後任北京大學教授兼清華大學、北平師範大學教席。

濠鏡寄廣州羅原覺

山翠當門且卜居，一年塵事了無餘。
意多始覺泉明晚，跡近能令務觀疏。
鄰樹鳥鳴同止止，海波鷗沒不徐徐。
眼前物我俱難得，回首鄉邦獨累歔。

端陽

羣鳥不渡海，況復競舟人？
投糴虛魚驚，抽蒲榜里鄰。
長沙始能弔，異地更無親。
風起江湖遠，南灣一望津。

澳門雜詩

倚欄樹不到檐庭，白日初黃月澹青。
樓外是山山後海，人生難得此居停。
一灣水弱不流花，寂寂連山長草芽。
五月海風多帶雨，亂飄隨雨過前沙。

濕草低田旱亦枯，海洲誰謂水都無？
憬然中谷三章後，不是憂深獨老夫。

巢鳥因風落短檐，屢回頭處語詹詹？
此情祇有卿能識，雨後闌干不上簾。

洵河洿澤日啁啁，豈有飛魚更可求？
三十六鱗初上水，卻無人釣馬留洲。
(澳門島名)

送客東南樓月中

山月出海白，晚雨收玄冥。
登樓望故國，送客揚歸舳。
中宵發南灣，平旦過新汀。
水行不逾宿，心遠當逃冥。
棲棲雲間鶴，苕苕風後萍。
浩浩波上鷗，寥寥欄外星。
攬裾思故好，攜手傷軒輊。
為言異方客，來此得安寧。

南灣觀朝雨

暫輟書聲對遠山，平生好景不多聞。
天逢一雨欣欣樂，海納羣峰故故彎。
得水鵝鵝逾斗大，浸田稂莠與人頑。
繁憂卻在治詩日，又見朝陽轉北灣。

李仙根 (1893-1943)

香山人，李遐齡裔孫。光緒卅四年 (1908) 入廣東陸軍小學，參加同盟會後參與辛亥革命武裝起義準備工作；1914年負笈日本；1917年歸國追隨孫中山在香港從事革命活動，1923年後任孫中山侍從秘書、機要秘書；曾任香山縣

長、中山縣長及西南政務委員；抗戰始任國民參政會參政員。有《嶺南書風》、《小客安堂詩鈔》及《秋波琴館遺詩》等。

澳門雜詩六首

樂土此堂堂，吾來怯近鄉。
寄離仍故國，觸物感殊方。
遠樹疑烽燧，歸禽亂夕陽。
不勝懷古意，望處是黃梁。

來尋永福社，云是宋疑陵。
天地昔曾改，山川今莫憑。
空濛依海市，恍惚見觚稜。
無限滄桑感，登臨淚易凝。

自昔逋逃藪，依稀三百年。
居安悲去國，心死早皈禪。
唯識存身妄，寧希舉目憐？
祇今過望廈，猶見寄生蓮。

市井不為辱，屠沽解報恩。
去懷阿惡地，客記孟嘗門。
早識侏儒戲，厭聞珠玉尊。
年來增太息，海氣正昏昏。

一雨新秋至，天風晚沕寥。
言尋鴻雁侶，來聽海門潮。
岸遠山如畫，帆歸影欲招。
臨流何所慕？鷗鷺迫人嬌。

墜簡滄桑後，芸香惜相遺。
十年勤掇拾，七葉冀昭垂。
蘇杜間關日，黃王避地時。
乞兒矜漆枕，憐我作書癡。

【本篇詩文錄自章文欽教授箋註之《澳門詩詞箋注》(民國卷)。謹此聲明並致謝！】